

Allaah Taa'alā Kī Nishaaniyaan

Taurait : Hijrat 4:1-17

Musā^(a.s) ne Allaah taa'alā se kahā, "Agar Israaeel ke logoṇ ne mujh par yaqeen naheeṇ kiyā to phir kyā karuṅgā. Wo log agar merī baat sunne ko taiyaar naheeṇ hue aur boleṇ ki maine Allaah taa'alā se baat naheeṇ kī hai."⁽¹⁾ Allaah taa'alā ne Musā^(a.s) se kahā "Tum apne haath me kyā pakdē hue ho?" Musā^(a.s) ne kahā "Ye laaṭhī hai jisse maiṇ bhedoṇ ko kaabu me kartā huṇ."⁽²⁾ Allaah taa'alā ne Musā^(a.s) se kahā, "Isko zameen par pheñko." To Musā^(a.s) ne usko zameen par pheñkā. Wo ek saamṛp ban gaī jise dekh kar Musā^(a.s) ḍar gae.⁽³⁾ Allaah taa'alā ne Musā^(a.s) se kahā, "Is saamṛp ko iskī puñch se pakdō." To Musā^(a.s) ne jab us saamṛp ko uskī puñch se pakdā aur wo phir se ḍaṇḍā ban gayā.⁽⁴⁾ Allaah taa'alā ne kahā, "Tum unke saamne yahī karnā taaki wo yaqeen kareṇ ki jis rab kī ibaadat Ibraaheem, Ishaaq, aur Yaaqub karte the, tum se usī rab ne baat kī hai."⁽⁵⁾

Tab Allaah taa'alā ne Musā^(a.s) se kahā, "Apnā haath apne kapdoṇ me ḍaalo." Musā^(a.s) ne apnā haath apne kapdoṇ ke añdar ḍaalā aur jab usko baahar nikaalā to wo barf kī tarah safed thā. Unke haath par khaal kī bimaarī ho gaī thī.⁽⁶⁾ Allaah taa'alā ne kahā, "Apnā haath waapas apne kapdō me ḍaalo." To Musā^(a.s) ne apnā haath waapas apne kapdō me ḍaalā aur jab baahar nikaalā to wo phir se ṭheek ho gayā aur unkī khaal waapas ṭheek ho gaī.⁽⁷⁾ "Agar wo tum par yaqeen nā kareṇ yā pahalī nishaanī ko nazar añdaaz kar deṇ to wo shaayad dusrī nishaanī par yaqeen kareñge.⁽⁸⁾ Agar wo in donoṇ nishaaniyoṇ par yaqeen nā kareṇ to tum Neel nadī se kuch paanī lenā aur sukhī zameen par ḍaalnā jo sukhī zameen par girte hī kħun ban jaaegā."⁽⁹⁾

Musā^(a.s) ne Allaah taa'alā se kahā, "Yā Allaah taa'alā maiṇ logoṇ ke beech bol naheeṇ paatā nā hī pahale bol paatā thā aur nā hī ab. Āp bhale hī is ġulaam se baat kar rahe haiṇ lekin, maiṇ āpsē sahī se aur jaldī baat naheeṇ kar pā rahā huṇ."⁽¹⁰⁾ Tab Allaah taa'alā ne unse kahā, "Iñsaan ko sunne kī taaqat kisne dī aur kaun usse bolne, sunne kī, aur dekhne kī taaqat cheen letā hai? Kyā maiṇ wo naheeṇ huṇ?"⁽¹¹⁾ Ab jaaō aur maiṇ tumhaare saath rahuṅgā, aur tumko kħud sikhaauṅgā ki kyā bolnā hai."⁽¹²⁾ Lekin, Musā^(a.s) ne kahā, "Yā Allaah rabbul kareem kisī aur ko bhej deejie."⁽¹³⁾ Tab Allaah taa'alā ko un par ġussā āyā aur kahā, "Tumhaarā kyā kħyaal hai Laawī khaandaan kā tumhaarā bhaaī Haarun ke baare me? Wo bolne me bahut accħā hai. Wo tumse milne ā rahā hai aur abhī raaste me hai aur jab wo tumheṇ dekhegā to uskā dil kħushī se bhar jaaegā.⁽¹⁴⁾ Tum usse baat karo aur bataao ki kyā bolnā hai. Jab tum bologe to maiṇ kħud tum donoṇ ke saath rahuṅgā. Maiṇ tumko sikhaauṅgā ki kyā karnā hai.⁽¹⁵⁾ Haarun tumhaare liye logoṇ se baat karegā aur tum use bataaoġe ki kyā bolnā hai. Maiṇ tumko uske upar rakhuṅgā jaise maiṇ tumhaare upar huṇ.⁽¹⁶⁾ Ye laaṭhī apne haath me le kar jaaō aur tum unheṇ wo nishaaniyaan dikhaao jo maine tumheṇ dī haiṇ."⁽¹⁷⁾